

官

爵

志

官商志卷之一

封建

明 嘉興徐石麟虞求輯

尚書疏曰黃帝分州畫野得百里之國萬區唐虞列
為五等此封建之始也禮制文嘉曰殷爵三等周五
等或謂黃帝五等也

品秩

自太昊以龍紀官唐虞建官能百未分品秩周官以
九儀正邦國自一命至九命漢自中二十石止二百石
魏陳群立九品官人之法北齊九品各分正從
朝正一品太師太傅太保從一品少師少傅少保太

子太師太傅太保正二品太子少師少傅少保正三品太子賓客不專授但為大臣加官兼官及贈官其餘官品俱見內外官職中

入流

通典曰隋制九品自太師始為謂之流內國朝正從一品至九品謂之入流即流內也

未入流

通典曰唐有流外勳品自諸錄事及五省內史始焉國朝九品之外雜職官員謂之未入流即流外也

文散官

漢諸侯有功德優盛朝廷所敬異者賜位特進三公
下隋文帝以為散官今正一品初進授特進榮祿大
夫陞授^特進光祿大夫漢有光祿大夫今從一品初授
榮祿大夫陞授光祿大夫正二品初授資善大夫陞
資政大夫加授資德大夫宋太宗改通議為通奉今
從二品初授中奉大夫陞授通奉大夫加授正奉大
夫隋散官有通議正議大夫今正三品初授嘉議大
夫陞授通議大夫加授正議大夫秦有中大夫大中
大夫今從三品初授亞中大夫陞授中大夫加授大
中大夫正四品初授中順大夫陞授中憲大夫加授

中議大夫隋散官有朝議朝請今從四品初授朝列
大夫陞授朝議大夫加授朝請大夫唐有奉議郎今
正五品初授奉議大夫加授縣政大夫從五品初授
奉訓大夫陞授奉直大夫正六品初授承直郎陞授
承德郎隋有承務郎宣德郎今從六品初授承務郎
陞授儒出身儒林郎吏才幹出身宣德郎唐有宣義
郎宋有承事郎今正七品初授承事郎陞授儒出身
文林郎吏才幹出身宣義郎隋有徵仕郎今從七品
初授從仕郎陞授徵士郎正八品初授典功郎陞授
修職郎從八品初授典功佐郎陞授修職佐郎正九

品初授將仕郎陞授登仕郎從九品初授將仕佐郎陞授登仕佐郎初授散官俱于三年之後照例陞授其加贈考驗本人生前功績合得加授者照例給與

武散官

周禮天子六軍軍萬二千五百人其將皆卿命蓋在國稱大夫在軍稱將軍自晉獻公作三軍而公將上軍故有將軍之名今為散官正從一品同文官正二品初授驃騎將軍陞授金吾將軍加授龍虎將軍從二品初授鎮國將軍陞授定國將軍加授奉國將軍正三品初授昭勇將軍陞授昭毅將軍加授昭武將

軍從三品初授懷遠將軍陞授定遠將軍加授安遠
將軍正四品初授明威將軍陞授宣威將軍加授廣
威將軍從四品初授宣武將軍陞授顯武將軍加授
信武將軍正五品初授武德將軍陞授武節將軍從
五品初授武畧將軍陞授武毅將軍正六品初授昭
信校尉陞授承信校尉從六品初授忠顯校尉陞授
忠武校尉

文勲

周禮王功曰勲齊梁始有勲品本酬戰士其後漸及
朝流楚寵官有上柱國唐以為勲官今正一品左右

柱國從一品柱國正二品正治上卿從二品正治卿
正三品資治尹從三品資治少尹正四品贊治尹從
四品贊治少尹正五品脩正庶尹從五品協正庶尹
凡文官一品至五品應合授勳者照依散官定擬奏
聞給授

武勳

後魏有柱國大將軍今正從一品同文勳秦有護軍
都尉唐改上大將軍為上護軍大將軍為護軍今正
二品上護軍從二品護軍漢武帝置輕車將軍唐置
上輕車都尉及輕車都尉今正三品上輕車都尉從

三品輕車都尉漢武帝置騎都尉唐置上騎都尉今
正四品上騎都尉從四品騎都尉隋置文散官為驍
飛雲武四騎尉今正五品驍騎尉從五品飛騎尉正
六品雲騎尉從六品武騎尉凡武官一品至六品應
合授勲者照依散官定擬奏聞給授

封贈

武王克商追王太王王季故後代有追謚追尊之典
兩漢逮今人臣亦有追贈之制漢宣帝思張賀掖庭
收養封恩德侯此追封之始也 國朝凡文官一品
贈三代二品三品二代四品至七品一代各照見授

職事依例封贈土官無封贈父祖例止給本人誥勅
一品玉軸四軸二品犀軸三品抹金軸俱三軸四品
抹金軸五六七品俱角軸二軸五品已上授誥織用
五色紵絲其前織文曰奉天誥命用制誥之寶六七
品授勅織用純白綾其前織文曰奉天勅命之寶俱
用升降龍文左右盤繞正從一品曾祖母祖母母妻
各封贈一品夫人正從二品祖母母妻各封贈夫人
正從三品各封贈淑人正從四品母妻各封贈恭人
正從五品宜人正從六品安人正從七品孺人曾祖
母母加太字按漢崔篆母師氏通經學百家言王莽

寵以珠體賜號義成夫人如淳云列侯子復為列侯
母稱太夫人蓋漢制也

宗室祿米

親王唐制歲該米四千八百石絹四千八百疋綿四
百五十斤宋制領節度使歲該穀二千四百石錢四
千八百貫絹二百疋綾一百疋羅十疋綿五百兩今
定米一萬石郡王唐制歲該米七百石田六十頃宋
制領觀察使歲該米一千二百石錢二千四百貫絹
二十疋綿五十兩今定米二十石鎮國將軍唐制歲
該米六百石田五十頃宋制郡王以下量材授官

照官品高下給祿今定米一千石輔國將軍唐制歲
詠米五百石田四十頃今定米八百石奉國將軍唐
制歲詠米四百石田二十五頃今定米六百石鎮國
中尉唐制歲詠米三百石田十四頃今定米四百石
輔國中尉唐制歲詠米三百石田八頃今定米三百石
奉國中尉唐制歲詠米一百石今定米二百石公主
及駙馬食祿二千石郡主及儀賓食祿八百石縣主
及儀賓食祿六百石郡君及儀賓食祿米四百石縣
君及儀賓食祿米二百石俱米鈔並之

漢艾止秦大侯不過萬家小者五六百戶則封國以戶也唐封公侯無國土其加實封者則食其所封之戶分食諸郡以租庸調給洪武初給官田量原定糧租分數收取後令公侯伯皆給祿米論功定數舊賜田還官永樂二年令照文武官例米鈔兼支

文武官俸給

唐正元四年定百官月俸僖昭之亂國用空闕天祐中止給其半後唐孔謙以軍儲不充請減半數而支竄錢宋定非兼職皆一分竄錢二分析支大明吳文武官俸正一品月支米八十七石從一品月支米

七十四石正二品月支米六十一石從二品月支米
四十八石正三品月支米三十五石從三品月支米
二十六石正四品月支米二十四石從四品月支米
二十一石正五品月支米十六石從五品月支米十
四石正六品月支米十石從六品月支米八石正七
品月支米七石五斗從七品月支米七石正八品月
支米六石五斗從八品月支米六石正九品月支米
五石五斗從九品月支米五石俱米鈔兼支米八流
月支米三石

吏員俸米

華譚曰天下吏人素無常祿惟以受贓為生熙寧三年始制天下吏祿而設重法以絕請託國朝五府提控六部都察院都吏布政司吏月支二石五斗五府掾吏六部都察院通政司太常光祿太僕寺應天順天府布政司都司衛各令史大理寺胥吏國子監鴻臚寺府庫局司牧局顏料局各府各司吏都察院太醫院各典吏按察司鹽運司各書吏月支二石五府六部大理光祿太僕寺國子監應天順天府布政按察鹽運都司衛各典吏十三道巡按各書吏翰林院光祿寺各署欽天監司歷太常祠祭署織染皮作

鑄印惠民雜造鞍轡軍器抄紙印鈔寶源局內府庫
石灰關各牧監會同館寶鈔鹽課龍江提舉司典牧
營膳享牧享牲紀善典膳奉祠典寶審理工正良醫
典儀理問千戶所五城兵馬布政按察鹽運斷事衛
鎮撫長史司州縣各司吏月支一石供米鈔兼支

廕叙

書皋陶稱舜曰賞延于世則廕叙自有虞氏始也漢
二千石以上視事滿三歲得任同產若子一人為郎
國初因前代任子之制文武一品至七品皆廕子
一人以世其祿成化三年奏准在京三_品以上官總令

一人送國子監讀書出身若大臣果有勲勞于國出自特恩錄用于孫者不在此限

鬻官

祭廷作秦

沿革曰鬻爵賣官三代無有起于秦漢之權利通典曰漢文帝納晁錯言令人入粟六百石爵上造萬二千石為大庶長漢武帝國用空竭募人入奴婢終身以為郎靈帝懸鴻榜開賣官路

試職

書曰明試以功唐武后凡舉人無賢不肖咸加擢拜大置試官宋神宗改官制有行試守三等試未正命

四官是作官品也階高官卑稱行階卑高官稱守國初凡在京初

入仕者試職一年御史試職半年考堪實授

會推

國朝進退大臣皆出于宸斷成化間始有吏部會官推舉之例其權遂歸于內閣

考滿

舜典三載考績三載黜陟幽明宋朝以考定勞一歲為考四考而遷國朝京官歷俸三年五品以下從監察御史考覈吏部覆考各以九年通考四品以上任滿黜陟取自上裁三年考滿給由到部亦定九

年一通考

休沐

史記李園事春申君謁歸故失期則假告已見于戰
國漢律吏得五日一休沐言休息以洗沐也唐永徽
三年以天下無虞百司務簡每至旬假許不視事以
寬百寮休沐然則休沐始于漢其以旬休始于唐也
國朝正旦即放假五日冬至三元宵十日

豁宿

宋朝館閣每夜輪一人直宿如有故不宿則虛其夜
謂之豁宿豁宿不得過五日即須入宿若遇豁宿不

到直宿歷書腹肚不安故相傳為害肚歷

致仕

書曰伊尹既復政厥辟告歸于王註謂云告老致政
事于君此臣下致仕之初也自周乃有大夫七十致
仕之禮

策免

漢成帝策免大司馬許嘉此策免大臣之始

德政碑

陸龜蒙有曰古者懸而空用木書之以表其功德因
留之不忍去碑之名由是而得自秦漢以降生有功

德政事者亦碑之而易之以石失其稱矣此德政有碑之起也

王祠

漢于公為吏縣曹決獄平郡中為立生祠自三代以來無生為立祠者至此始見其事

戒石銘

餘冬稿曰今之戒石四字銘爾俸爾祿民膏民脂下民易虐上天難欺舊傳乃宋太宗書以賜諸郡縣者其辭則摘蜀王孟昶之文也自是天下始有戒石亭考歐陽集古錄稱唐明皇擇令一百六十三人賜以

新蔡縣志

丁寧之戒其後天下為縣者皆以新戒刻石又知戒
石不自宋始蓋唐已有之特不見其辭耳

官爵志卷之二

明 嘉興徐石麟虞求輯

宗人府

周有宗正漢置官以序九族 國初置大宗正院
洪武二十二年改院為府設宗人令左右宗正左右
宗人俱正一品首領官經歷司經歷正五品職專玉
牒譜系之事初以親王領府事後但以勲戚大臣掌
之而不備官

六部

國初因元制置中書省設左右丞相等官天下政事

皆由之而出其屬有四部分治錢穀禮儀刑名營造之務洪武元年始定吏戶禮兵刑工六部俱正三品衙門仍屬中書省十三年中書省革陞六部尚書為正二品左右侍郎二員正三品首領官司務廳司務從九品屬官郎中一員正五品員外郎一員從五品主事正六品按秦少府遣吏四人在殿中主發書謂之尚書漢光武始分尚書為六曹秦以郎為內侍故曰侍郎隋煬帝于六曹各置侍郎一人秦以郎侍衛居中故曰郎中隋文帝于尚書二十四司各置員外郎一人謂本員之外復置郎也後魏于尚書諸司置

主事今史隋煬帝但曰主事皆吏長之名也

吏部

漢成帝置常侍曹光武改為吏部今尚書即周天官卿也侍郎即周少宰也所屬有四清吏司曰文選因隋選部今掌天下文吏班秩品命曰驗封因唐司封今掌邦之封爵曰稽勲因周司勲今掌邦國宮人之勲級曰考功因魏考功今掌文職官吏考課

戶部

吳有戶部今尚書即周之所謂地官卿也侍郎即周之小司徒也首領官照磨所照磨一員正八品檢校

一員正九品所屬隋曰民部魏曰度支金部倉部今
改為浙江江西湖廣陝西廣東廣西山東山西福建
河南四川雲南貴州十三清吏司各掌一布政司戶
口錢糧仍量繁簡帶管直隸州縣每司內分民度金
倉四科以領其事

太倉

秦漢大司農屬官有太倉令丞唐玄宗以監察御史
充太倉出納使梁改曰如京使取詩如坻如京之義
今屬戶部郎中員外郎主之

戶部所屬

寶鈔提舉司提舉一員正八品寶鈔廣惠庫收各處
解到鈔錢廣積收紵絲綾羅綃黃等物贓罰庫收籍
沒官民衆財追沒官吏贓物并錢鈔紵絲綾羅綃絹
毯氈鐵皮綿布衣服花絨等物甲字庫收布疋顏料
乙字庫收紵絲綿布髀襖袴鞋毛袄等物丙字庫收
綿花絲綿等物丁字庫收銅鐵皮張蘓木等物戊字
庫收軍器胡椒等物各大使正九品各副使從九品
寶盈庫收紵絲紗羅綾綿綢絹布疋等物御馬倉南
京龍江鹽倉檢校批驗所張家灣檢校批驗所抄紙
局印鈔局各大使副使俱未入流

禮部

漢成帝置客曹隋為禮部今尚書即周春官大宗伯卿也侍郎即周小宗伯也所屬有四清吏司曰儀制因魏儀曹今掌舉其儀制而辨其名數曰祠祭因晉祠部今臺祭饗天文漏山國忌廟諱卜筮醫藥道佛之事曰主客因周官令掌諸蕃朝貢等事曰精膳因北齊膳部今掌邦國牲牢酒膳辨其品數

禮部所屬

鑄印局大使一員副使一員俱未入流教坊司唐高祖置內教坊武后改為雲韶府以中官為使宋以伶

人又次者為之今設奉璽一員正九品左右韶舞左右司樂各二員俱從九品

兵部

魏置五兵隋為兵部今尚書即周夏官大司馬卿也侍郎即小司馬也所屬有四清吏司白武選因魏五部郎曹令掌天下武職班秩品命職方因周官令掌天下地圖及城隍鎮戍烽候之政曰車駕因魏駕部令掌邦國輦車及天下傳驛廐牧曰武庫因魏庫部令掌邦國戎器儀仗辨其出入之數

兵部所屬

會同館大使一員正九品副使二員從九品南京典
牧所提領一員正八品大使一員正九品典史一員
大勝關大使一員副使一員俱未入流

刑部

故疑作改

宋置都官隋為刑部今尚書即周秋官大司寇卿也
侍郎即周小司寇也照磨檢校品與戶同司獄司司獄
六員從九品古屬有四曰憲部比部司門部都官部
今故為浙江等十三清吏司各掌一布政司刑名仍
置繁簡帶管直隸州縣并在京衙門每司分憲比司
門都官四科以領其事

工部

晉有起部隋為工部今尚書即周冬官大司空卿也
侍郎即周小司空也所屬有四清吏司曰營繕今掌
經營興造衆務曰虞衡因周禮虞衡之官今掌天下
山澤而辨其時禁曰都水因隋水部今掌天下陂池
川瀆政令曰屯田因晉今掌天下屯種政令

工部所屬

營繕所所正正七品所副正八品所丞正九品文思
院唐有文思院宋始掌工巧之事以時文思索故工
作之所號織染所皮作局顏料局鞍轡局寶源局大

使俱正九品副使軍器局大使俱從九品副使未入
流大通關提舉司龍江提舉司提舉俱正八品副提
舉俱正九品典史押分竹木局大使副使俱未入流

都察院

周官有御史秦有御史大夫漢御史有臺中丞以其
別在殿中掌蘭臺秘書外督部刺史內領侍御史北
齊後周不置大夫而以中丞為臺主唐分為左右臺
大夫漢武帝始有侍御史魏文帝始遣御史居殿中
隋文帝始有監察御史宋為御史臺其屬有三院一曰臺院知
雜御史為侍御史隸焉二曰殿院言事官為殿中侍

御史隸焉三曰察院考察官為監察御史隸焉國
初置御史臺後改為都察院設左右都御史正二品
左右副都御史正三品左右僉都御史正四品職專
糾劾百司辨明冤枉提督各道及一應不公不法事
首領官經歷正六品都事正七品照磨檢校各一員
司務二員司獄六員品同戶刑其屬浙江等十三道
監察御史正七品凡遇刑名各照道分送問發落

御史差委

國朝宣德二年差御史各處清天順二年奏准三年
更替正統元年差御史提督南北直隸學校三年差

御史巡視鹽課十三年差御史巡視京城成化三年
差御史于陝西巡茶一年更代凡差委御史出巡追
問審理刷卷等事都御史具事自請 旨點差

巡撫

永樂間遣尚書侍郎少卿等官鎮守景泰間因與巡
按不相統屬難以行事遂定都御史巡撫兼軍務事
者加總督督理掌糧餉事者加總督兼理他如整飭
邊備提督邊關及撫治流民等項者皆隨事異名若
邊境有事又有總督提督總制叅贊、理及經略巡
視之名近例尚書侍郎治事于外者兼都御史以便

行事，畢而罷

通政使司

唐虞納言官也。今通政使正三品，左右通政使正四品，左右叅議正五品。職專司出納，帝命通達下情，關防諸司出入公文，奏報四方臣民實封建言陳情伸訴，以及于軍情、赦息、災異等事。首領官經歷正七品，知事正八品。

大理寺

黃帝立後土，辨乎北方，故為大理官也。舜命皋陶作士，士理官也。秦置廷尉，漢因之。景帝復為大理，取天

官責人之牢曰大理之義梁為秩卿後魏置少卿晉
置丞唐因之今卿正三品左右少卿正四品左右寺
丞正五品首領官司務從九品具_屬左右二寺左右寺
正正六品即秦廷尉正也左右寺副從六品左右評
事正七品因隋官_也職專審錄天下刑名凡刑部都察
院司道罪有出入者依律照駁事有冤枉者推事辨
明

太常寺

周禮春官職也秦曰奉常王者旌旗畫日月大事則
建以行禮官主奉持之漢改曰太常尊大之義也後

漢有卿隋有少卿秦有丞今卿正三品少卿正四品
寺丞正六品職專祭祀之事首領典簿正七品曰漢
官也屬官博士正八品曰秦官也協律郎正八品因後
魏也贊禮郎正九品曰漢治禮郎也司樂從九品神
樂觀提點正六品知觀從八品犧牲所吏目從九品
隋有郊社令漢文帝有籍田令唐有陵臺令今天地
壇山川壇籍田孝陵長陵獻陵景陵裕陵茂陵各祠
祭署奉祠各一員俱從七品祠丞各一員俱從八品

鴻臚寺

周官大行人春為典客漢改曰鴻臚鴻敎臚傳之也

傳報贊道也隋有丞唐有主簿今卿正四品左右少卿從五品左右寺丞從六品首領主簿從八品屬官司儀署司賓署署丞正九品鳴贊序班俱從九品職專朝儀宣贊等事

光祿寺

漢有光祿勳梁改光祿卿今卿從三品少卿正五品寺丞從六品職專膳羞宴饗等事首領典簿從七品錄事從八品屬官大官珍羞良醢掌醢四署署正俱從六品署丞俱從七品監事俱從八品司牲司司牧局大使俱從九品副使使未入流

太僕寺

洪武初置太僕寺在滁州置北平遼東陝西甘肅為
行太僕寺永樂間改北平稱太僕寺正正統間定滁
為南京太僕寺按周官有太僕秦與漢有丞梁有主
簿今卿從三品少卿正四品寺丞正六品職專司牧
馬之事首領主簿官從七品常盈庫大使俱未入流
太僕寺官品同

尚寶司

漢有符節令位次中丞領上符璽

今卿正五品少卿從五品司丞正六品職專寶璽符

牌等事

國子監

按一位之元長
活字宗書

國子周制也晉武帝初立國子學隋煬帝改為監正
官名祭酒皆一位之元長古者得主人饌則老者一
人舉酒以祭地故以祭酒為稱周封兄弟同姓成王
時彤伯為祭酒主親屬秦漢曰之晉武帝始置國子
祭酒國子博士助教隋煬帝置司業取樂正司業之
義亦置監丞北齊置五簿今祭酒從四品司業正六
品總總監丞正八品博士廳五經博士典簿廳俱
從八品典籍廳典籍從九品掌饌廳掌饌未入流率

立疑作典

性脩道誠心正義崇志廣業六堂助教俱從八品學
正正九品學錄從九品職專教化之事

翰林院

學士之稱始自漢晉而命官起于宋齊唐明皇始置
翰林院改供奉為學士禁中亦有侍講侍讀學士至
宋真宗始置二職于翰林明皇始置史館脩撰編修
今學士正五品侍講侍讀正士從五品首領官孔目
未入流屬官侍講侍讀正六品五經博士正八品典
籍從八品侍書正九品侍詔從九品史官脩撰從六
品編修正七品檢討從七品職掌制誥史冊文翰等
事庶吉士永樂間選二甲三甲中進士為庶吉士隸

本院命學士教之學業成者二甲除編修三甲除檢討餘除科道部屬

翰林陞用

雙溪雜記云自來陞用六部堂上官不拘出身何衙門初無內閣禮部必用翰林出身人之例成化弘治以來吏部必同翰林一人禮部非翰林出身者不得陞入由是翰林人多陞顯要矣

大學士

學士無大稱唐中宗欲以崇寵大臣乃有大學士之

名唐至五代有文明殿大學士為宰相兼職宋真宗
寵王欽若罷政特置資政殿學士班在翰林上今設
華蓋殿武英殿文華殿文淵閣東閣大學士俱正五
品班在本院學士上永樂初簡命編脩等官于文淵
閣叅預機務謂之內閣漸陞至學士等官洪熙元年
以輔導任重加陞至師保及各部尚書侍郎職銜仍
兼學士大學士又添設謹身殿大學士以後或由他
官入閣辦事者皆兼學士大學士唐末有閣門使今
閣門使正六品武英殿承天門右順門待詔從九品

內閣權重

瑣綴錄有云 國朝初不設宰相永樂初年乃設內閣選翰林院六七臣居之職知制誥日脩顧問對叅決政機隱然相職而官不過學士洪熙初始陞孤卿皆潛邸舊人

詹事府

秦官漢因之掌太子家唐始置少詹事一人以貳詹事今詹事正三品少詹事正四品府丞正六品首領主簿正七品錄事從九品屬通事舍人按漢司隸官有功曹從事史從錄衆事東晉有通舍人事

左右春坊

周太子官有庶子唐始置太子諭德中允贊善漢丞相府司直今左右庶子俱正五品左右諭德從五品左右中允正六品左右贊善左右司直郎俱從六品左右清紀郎從八品左右司諫從九品

司經局

國語曰勾踐為夫差洗馬如淳曰前驅也晉太子詹事屬官有洗馬八人掌太子圖籍經書漢蘭臺東觀藏書有校書之職後以郎居其任故謂校書郎元魏始命為官齊集書省有正書官北齊為正字今洗馬從五品校書正九品正字從九品凡本府官皆以東

宮輔導侍從為職

中書科

秦始置中書謁者漢元帝去謁者字魏文帝改秘書省為中書省今為中書令置通事郎後改為中書侍郎隋文帝中書令與侍中知政事為宰相舍人本周官掌乎宮中之政晉初置中書舍人國初中書省設直省舍人後革省為科定中書舍人從七品職專書寫誥勅冊等事

六科

古諫官秦有諫大夫後漢有諫議大夫唐分為左右

武后置左右補闕拾遺宋太宗改為司諫正言秦漢
別有給事黃門之職後漢有給事黃門侍郎左右給
事中以有事殿中故曰給事中今設吏戶禮兵刑工
六科為諫官每科都給事中正七品左右給事中給
事中俱從七品專職叅駁糾劾等事

六科廊

國朝六科本與尚寶司相隣今工部委官製衣處猶
稱六科廊是也永樂間失火遷出于午門之外今遂
為定居

近侍

菽園雜記云翰林院尚寶司六科官在前常朝俱在奉天門上御座左右侍立故云近侍今在門下御道左右云是太宗晚年有疾因女官扶持上下因退避居下遂為定位

行人司

周官有行人今設司正正七品左右司副從七品行
人正八品職專冊封葬祭宗室及出使外夷等事

太醫院

周有醫師上士下士秦漢少府屬有太醫令丞元置
太醫^院有使副判各一員今設院使正五品院判正六

品首領吏目從七品屬官御醫正八品職專診視疾
病修合藥餌等事 所屬惠民藥局生藥庫大使副
使俱未入流

欽天監

少昊鳳鳥氏為歷正夏曰大使周禮春官有保章氏
夏官有挈壺氏唐改司天監唐有少監宋置大使正
唐有五官正靈臺郎今設監正正五品監副正六品
首領主簿正八品屬官春夏秋冬官正正六品五
官靈臺郎從六品五官保章正正八品五官提壺正
從八品五官監候五官司歷俱正九品五官司農漏
刻博士俱從九品職掌歷數天文地理之事

上林苑監

漢武帝始起上林苑隋置宮苑總監唐置宮苑使
國朝永樂五年置左右監正正五品左右監副正六
品左右監丞正七品首領典簿正九品蕃育嘉蔬良
牧林衛四署典署正七品署丞正八品錄事正九品
職專苑囿蕃牧種植等事

五城兵馬指揮司

宋以四廂都指揮使巡警京城神宗置勾當左右廂
令今廢作分公事民間謂之都廂令指揮正六品副指揮正七品

首領吏目未入流職專京城巡捕等事

京府

周成王命君陳尹東郊漢武帝更右內史為京兆尹
秦置郡丞漢設治中一人居中治事主衆曹文唐宋
太祖諸州置通判唐鄜度等使皆有推官唐高宗有
檢校梁州諸軍事今南京應天府北京順天府府尹
正三品府丞正四品治中正五品通判正六品推官
從六品首領經歷從七品知事從八品照磨從九品
檢校未入流司獄從九品

所屬衙門

隋有州博士唐德宗改為文學宋神宗于諸大郡府
始置教授一人掌教導諸生今儒學教授一員從九
品訓導一員未入流都稅司宣課司各門稅課司織
染局草場大使俱從九品副使俱未入流各門分司
副使倉運運所金銀場錢冶批驗所大使副使俱未
入流

京縣

南京上元江寧二縣北京大興宛平二縣知縣正六
品縣丞正七品主簿正八品典史未入流

公侯伯

唐虞輯五瑞爵有公侯伯子男隋文帝始封功臣為國公唐代宗以射主軍清難始賜名寶應功臣國初封功臣爵有五等後華子男具封公侯伯者皆給誥券或世襲或不世襲以功高下為等

駙馬

駙馬非正駕車者皆為駙馬一曰附近也疾也漢武帝置駙馬都尉以假功臣戚屬晉尚公主署始加之今公主婚皆稱駙馬都尉賜誥命

五府

晉為都督諸軍事國初置統軍大元帥府改樞密

院又改為大都督府洪武十三年始分中左右前後
軍都督府設左右都督府正一品都督同知從一品
都督僉事正二品首領用文職經歷從五品都事正
七品各府分管在京在外衛所職專軍旅之事初以
公侯伯為之後或掌府事都督僉書軍政所屬都司
二十一處留守司一處內外衛四百九十一處守禦
屯田群牧千戶所三百一十一處儀衛司三十三處
宣慰司二處招討使司一處宣撫司六處安撫司十
六處長官司七十處番夷都司衛所等四百七處

禁衛

周有虎賁氏漢京師有南北軍掌理禁衛又有羽林
郎武帝更秦中尉為執金吾唐置神策神武等軍五
代後唐有侍衛親軍禁軍號控鶴年多者號寬衣控
鶴宋改為天武今在京親^軍不屬府者惟錦衣衛旗手
旗府軍衛府軍左右前後四衛金吾左右前後四衛
羽林左右前三衛燕山左右前三衛虎賁左衛大興
左衛濟陽濟川通州三衛共二十二衛後又設騰驤
左右^{武驍左右}四衛亦係親軍并武功中左右永清左右彭城
長陵景陵顯陵裕陵茂陵俱不屬府

錦衣衛

唐置營幕使宋置儀鑾使國初置儀鑾使後罷司
置衛統軍同諸衛而所隸又有將軍力士校尉人等
職掌直駕侍衛巡捕等事其任遇漸加視諸衛獨異
首領鎮撫司問理本衛利名成化十四年始增鑄印
信各為一司經歷用文職本衛文移出八所屬錦衣
中左右前後五所又分鑾輿擎蓋扇手旌節幡幢班
劍斧鉞戈戟弓矢馴馬十司統領校尉掌鹵簿儀仗
及直駕擎人直宿等事上中左右前後中後親軍七
所分管力士軍匠又馴象所領本衛軍奴養象以備
朝會陳列及駕輦馱寶之用

旗手衛

國初置旗手千戶所後陞為衛掌大駕金鼓旗纛統領隨駕力士及宿衛等事

京衛武學

宋神宗始就武成王廟側建武學如太學儀國朝京師建武學儲養京衛幼官與子弟未襲職者設教授一員從九品訓導六員未入流

南京文武衙門

南京在洪武間為京師自永樂定都于北因名南京文武官並置在南京與北京同但如南京二字

南京衙門牌扁

瑣綴錄曰南京文武各衙門俱有牌扁直書衙門之名惟翰林院三字橫列而兵部獨無相傳洪武間一夕潛有掣去之者詰旦具聞上不之省蓋以示去兵之意至今不敢復揭

官爵志卷之三

明 嘉興徐石麒虞求輯

十三省承宣布政使司

唐有叅知政事宋下宰相一等元尚書省亦置為宰相之貳行省亦有左右叅政唐高祖有檢校隋改都令史為都事今左右布政使從二品左右叅政從三品左右叅議從四品首領經歷司經歷從六品都事從七品照磨所照磨從八品檢校正九品理問從六品副理問從七品提控案牘未入流各省所屬庫造織染局大使副使陝西四川茶馬司洪武初令陝西

洮州河州西寧各設茶馬司收貯官茶每三年一次
差在京官選調邊軍齎捧金牌信符往附近番夷將
運去茶馬給與邊軍騎操大使正九品副使從九品
廣西裕民司雲南滇池魚課司大使副使俱未入流

各府

秦罷侯置守漢景帝更名太守王莽改曰太尹今知
府一員正四品同知正五品通判正六品添設無定
員推官一員正七品首領經歷正八品知事正九品
照磨從九品檢校未入流所屬司獄司司獄從九品
儒學教授一員從九品訓導四員未入流陰陽學正

術醫學正科僧綱司都綱道紀司都紀俱從九品副
都綱副都紀俱未入流稅課司分司倉庫局雜造織
染局大使俱從九品副使及茶鹽批驗所茶倉魚課
司金銀場局鐵冶所大使副使俱未入流府州縣巡
檢司巡檢從九品水馬驛丞遞運所大使河泊所官
開官壩官俱未入流

各州

唐代宗勅御史有故及闕但令上佐依次知州事隋
使府判官為諸使官屬五代始領郡事為州府職今
知州一員從五品同知從六品判官從七品添設無

定員若不及三十里長有屬縣者裁減同知無屬縣者裁減同知判官首領吏目一員從九品所屬儒學學正一員訓導二員陰陽學典術醫學典科僧正司僧正道正司道正縣州倉稅課局茶課司大使副使俱未入流

各縣

周置四百里為縣官有縣正晉謂之大夫魯衛謂之宰楚謂之令尹唐大中年裴讓權知縣事定以朝官知縣秦置令丞後漢有郡主簿亦曰督郵隋諸縣始置堂勾稽簿籍今知縣正七品縣丞正八品主簿正九

品添設無定員若不及二十里長裁革縣丞主簿首領典史一員未入流所屬儒學教諭一員訓導二員陰陽學訓術醫學訓科僧會司僧會道會司道會俱未入流

十三省提刑按察司

唐置十道按察司宋轉運使兼之按察司元各道置提刑按察使有副使簽書公事為之貳又置經歷知事等員後改肅政廉訪司今按察使一員正三品副使正四品僉事正五品添設無定員首領經歷正七品知事正八品照磨正九品檢校從九品司獄司司

職從九品

都轉運鹽使司

宋熙寧有人都大提舉茶馬事紹興後置提舉茶鹽
司元置都提舉同提舉副提舉等員今廣東陝西四
川雲南鹽課司提舉從五品同提舉從六品副提舉
從七品首領吏目從九品

苑馬寺

今卿從三品少卿正四品寺丞正六品書令正簿從
七品所屬各監監正正七品監副正八品錄事未入
流苑圍長從九品

衍聖公

宣聖襲封衍聖公孔氏子孫正二品司樂管勾典籍
俱未入流孔顏孟三氏教授從九品學錄未入流

王府長史司

秦置郡丞以佐守在邊為長史掌兵馬今王府左右
長史正五品首領典簿正九品所屬審理所審理正
正六品審理副正七品紀善所紀善正八品典寶所
典正正八品典寶副從八品典膳所後漢有太子食
官隋改為典膳正今王府因之典膳正正八品典膳
副從八品奉祀所奉祀正正八品奉祀副從八品典
樂正九品良醫所良醫正正八品良醫副從八品工

正所工正正八品工副從八品典儀所元有太子典儀今王府因之典儀正正九品典儀副伴讀教授俱從九品引禮舍人倉庫大使副使俱未入流郡王府典膳正八品教授從九品

中都留守司

唐明皇太原置尹以為留守謂之三都留守蓋車駕不在京則置留守今留守正二品副留守正三品首領經歷司經歷正六品都事正七品

各都指揮使司

唐兵志曰僖宗幸蜀以神策大將軍為都指揮使今都指揮使正二品都指揮同知從二品都指揮僉事正三品首領經歷司經歷正六品都事正七品司獄司司獄從九品斷事司斷事正六品副斷事正七品吏目未入流庫大使從九品副使草場大使倉副使俱未入流

各衛

漢武初置衛將軍令一衛隸軍五千六百名指揮使正三品指揮同知從三品指揮僉事正四品衛鎮撫從六品首領經歷司經歷從七品知事正九品所屬

千戶所隸軍一千一百二十名正千戶正五品副千戶從五品百戶所隸軍一百一十名百戶正六品每所設總旗二名小旗十名已上武官俱世襲惟首領屬官選除

衛學

國朝軍衛無學宣德十年從兵部尚書徐河之請令天下軍衛獨泊一城者皆立學正統以來天下軍衛延至邊徼建學設教授訓導品秩俸祿如府學之制

鎮戍

唐制緣邊戎寇之地則加以旌節謂之節度使武德

初邊要之地亦置總管以統軍 國朝凡天下要害處所專設官統兵鎮戍總鎮一方者曰鎮守獨守一路者曰分守獨守一城一堡者曰守備有與主將同處一城者曰協守又有備倭提督提調巡視等官其官稱掛印專制者曰總兵次曰副總兵曰叅將曰遊擊將軍俱于公侯伯都督都指揮等官內推與克任

土官宣慰使司

唐以藩方不靖遣重臣宣諭慰安之故有慰使^宣之名今宣慰使從三品同知正四品副使從四品僉事正五品首領經歷司經歷從七品都事正八品儒學教

授正九品訓導未入流宣撫司學同

宣撫使司

唐有宣撫使宋不常置有軍旅大事則命執政大臣為之全宣撫使從四品同知從五品副使從五品僉事正六品首領經歷司經歷從八品知事正九品

招討使司

唐有招討使用兵權置後以節度使兼之元有招討使副招討今招討從五品招討副正六品首領吏目從九品經歷從二品

安撫司

隋有安撫大使唐以節度使兼之宣德置副使今安撫從五品同知正六品副使從六品僉事正七品首領吏目從九品

長官司

長官正六品副長官從六品吏目教諭訓導俱為未入流

蠻夷長官司

長官正七品副長官從七品已上土官俱世襲惟首領屬官選除

吏目

文獻通考曰西漢開儒吏二途以取人未為抑揚輕重自後判為兩途儒詎吏為俗吏諛儒為迂故拘譴不通者一歸之儒放蕩無恥者一歸之吏而二途皆不足以得人矣

六房

唐張說為相改政事堂號中書門下列五房于後一曰吏房二曰樞機三曰兵房四曰戶房五曰刑房禮旁分以曹官主衆務焉國朝各衙門立吏戶禮兵刑工六房吏典書辦文移

吏員出身品級

通典曰令史漢官也晉中書有主書之員齊為主書
令史後魏于尚書諸司置主事令史又尚書有都令
史宋太祖知堂吏擅中書事權多為奸賊故選授用
正人神宗行官制除堂後堂之名于門下省中書省
置錄事而已 國朝一品二品衙門提控都吏通吏
出身從七品一品二品衙門掾吏令史典吏出身正
八品內府門吏出身正八品三品衙門令史胥吏書
吏出身從八品三品衙門典吏四品衙門令史出身
正九品四品衙門典吏五品衙門司吏典吏巡按書
吏各道書吏出身從九品六品七品八品九品并雜職
衙門吏典都察院各道典吏俱出身雜職